

Siunnersuummut nassuiaatit

## **Nassuiaatit nalinginnaasut**

### **1. Aallaqqaasiut**

Suliniutini angisuuni illuliortiternernik sanaartornernillu suliassat pillugit Inatsisartut inatsisaat nr. 25, 18. december 2012-imeersoq (suliniutinut angisuunut inatsit) 1. januar 2013-imi atuutilerpoq. Inatsimmut pingaarnertut siunertaq tassaavoq Kalaallit Nunaanni suliniutini angisuuni atugassanik unammillersinnaasunik tunniussaqaarnissaq, taamaalillunilu Kalaallit Nunaanni suliniutini angisuuni aningaasaliisartunik aggersaallunilu attassinissamut pitsaanerusunik periarfissanik pilersitsinissaq.

Suliniutit angisuut sanaartorfiunerisa nalaanni sulisartunik nunanit allaneersunik aningaasarsiaqaarnikkut atorfinitsitaanikkullu atugassarisanik nunani tamalaani atugassarisat assinginik imaluunniit assingusunik, imaluunniit nunani allani appasinnerusunik aningaasarsiat inissisimaffeqartut appasinnerusunillu sulisartunullu aningaasartuuteqartut atugaqartillugit atorfinitsisinissaq suliniutinut angisuunut inatsisip periarfissippai. Suliniutinut angisuunut inatsimmut siunertaq tassaavoq nunani allani atugassarisanut naleqqiullugit, ilanngullugit nunat allat appasinnerusunik aningaasarsiatigut inissisimaffeqartunut, aamma appasinnerusunik sulisartunut aningaasartuuteqartunut Kalaallit Nunaanni suliniutit angisuut atugassarisat unammillersinnaanerulersinnissaat.

Suliniutinut angisuunut inatsimmut ilassutitut siunertaq alla tassaavoq suliniutit angisuut illuliortifigalugillu sanaartorfiunerisa nalaanni inuiaqatigiinni aningaasaqarnermut siunertarinngisamik killup tungaanut, aammalu suliffeqarfimmi qarsunniagassanik pinngortoqarneratigut inuussutissarsiorfiit sinnerisa unammillersinnaassusaanni sunniummik nassataqartinnissaata pinaveersinnissaa. Assersuutigalugu aatsitassarsiornermik suliffissuaqarfimmi ineriartortoqarnerata nassatarisaanik illuliornermik sanaartornermillu immikkoortoqarfimmi illunnaasiortumik annertuumik piumasqaortoqarnerata siunertarinngisamik nassataqarnera tamatigoortut aningaasarsiani aningaasartuutinilu inissisimaffimmi naleqqutinngitsumik qaffariartoqarneq nassatarisinnaavaa. Tamatuma suliffeqarfiit nunami namminerme soorlulusooq nunat tamalaani unammillersinnaassusaannik nalinginnarmik ajortisaanermik nassataqarsinnaavoq, aammalu aatsitassarsiornermik immikkoortoqarfimmut attuumassuteqartumut illuliortunilu sanaartornermik immikkoortoqarfiup ilaanut naleqqiullugu immikkoortoqarfinni allani aningaasaliisarnermi suliffeqartitsinerullu inissisimaffiani ajortisaanermik nassataqarsinnaalluni.

Suliniutinut angisuunut inatsit illuliorlunilu sanaartormik immikkoortoqarfiup iluani sun-  
giussiasunik piginnaasanik, akunnequtitut atuussinnaasumik pissarsinissamik periarfissiivoq,  
taamaalilluni inuussutissarsiorfiup sananeqaataata sinnerani siunertarinngisanik kissaatigin-  
ngisanillu kingunerisassanik nassataqartunik illuliorlunilu sanaartormik immik-  
koortoqarfiup iluani piumasaqarnerni annertuunik appariartoqarneranik imaluunniit anner-  
tuseriarnernik pinaveersitsisoqassalluni.

Suliniutinut angisuunut inatsisissatut siunnersuut ”Kalaallit Nunaanni inuussutissarsiornikkut  
ingerlatassat angisuut pilersinniarneqarneranni sinaakutissatut piumasaqaatit pillugit nassui-  
aat”-mmik qulequtalittut Nassuiaat tunngavigalugu saqqummiunneqarpoq, tamannalu ulloq  
10. maj 2012-imi Inatsisartut 2012-imi upernaakkut ataatsimiinneranni oqaluuserisassatut  
Naalakkersuisut saqqummiuppaat.

Milliardimik ataatsimik danskit koruuniinik aningaasanik killiliussaq ilaatillugu Inatsisartut  
inatsisissaannut siunnersuummut allaqqaakkamik nassuiaat imaqarpoq. Aningaasanut killili-  
ussaq taanna 2012-imi Inatsisartut ukiakkut ataatsimiinneranni oqaluuserisassanngorlugu  
saqqummiunneqartumi suliniutinut angisuunut inatsisissatut Naalakkersuisut siunnersuutaanni  
aalajangerneqarpoq.

## **2. Siunnersuummi immikkoortut pingaarnertit**

### *1) Inatsisit atuuttut*

Inuussutissarsiornermut Ataatsimiititaliap qinnuiginninnerata kingornatigut suliniutini angisu-  
uni illulioriternernik sanaartornernillu suliassat pillugit Inatsisartut inatsisaanni § 5, imm.  
1, nr. 1, imm. 3-mut matuminnga ilanngussassatut siunnersuutip aappassaaneernissaanik  
Naalakkersuisut saqqummiussipput:

*”Suliniutit taakkununga attuumassuteqartunullu ilaangillat nerisassiorneq, nerisarfinnik  
kantiinanik ingerlatsineq, eqqiaaneq, sumiiffimmi assartuineq tamatumunnga attuumassute-  
qartut suliallu assigisaat kifartuussinerillu.”*

Inuussutissarsiornermut Ataatsimiititaliap qinnuiginninnerata kingornatigut § 6, imm. 1, nr. 1-  
imut allannguutissatut siunnersuutip aappassaaneernissaa Naalakkersuisut saqqummiuppaat,  
tassani suliniutinut angisuunut inatsimmi malittarisassiat malillugit suliniummik neqeroorute-  
qarsinnaanermut aningaasat 1 milliard kr.-nit 5 milliarder kr.-nut qaffanneqarlutik. Sulini-  
utinut angisuunut inatsit malillugu akuersissutit nalunaarutiginnissat pillugit Naalakkersuisut  
suli qinnuteqaatinik tigusaqarsimangillat.

Suliniut suliniutitut angisuutut neqeroorutigineqarsinnaaneranut § 6, imm. 1, nr. 2-mi aamma  
3-mi piumasaqaataasut sinneri taakku marluk Inatsisartut siunnersuummik oqaluuserin-  
ninnerisa nalaanni allanngortinneqangillat. 5 milliarder kr.-nik aningaasat killeqartinnissaasa  
saniatigut suliniummik angisuumik sanaartortoqarnerani Kalaallit Nunaanni pis-

sarsiarineqarsinnaasutut naleqquttutut, suliffeqanngitsutut pissarsiarineqarsinnaasutullu najukkami sulisartut sinnerlugit sulisussanik pisariaqartitsineq piumasaqaataavoq. Tamatuma saniatigut suliffeqarfinni, sanaartornermik sulianik isumaginnittartuni teknikkip tungaatigut aningaasaqarnikkullu piginnaasarisaniq suliniutip angisuup piumasaqaatigisai teknikkip tungaatigut aningaasaateqarnikkullu tunngatillugu Kalaallit Nunaanni suliffeqarfiit piginnaasaannik qaangiisimassanera piumasaqaataavoq.

## 2) Siunnersuut

2. pkt.-imik imatut oqaasertaqartumik atorunnaarsitsinermigut siunnersuummi § 1, nr. 1-imi aalajangersagaq § 5, imm. 3-mik allannguivoq:

*”Suliniutit taakkununga attuumassuteqartunulli ilaangillat nerisassiorneq, nerisarfinnik kantiinanik ingerlatsineq, eqqiaaneq, sumiiffimmi assartuineq tamatumunnga attuumassuteqartut suliallu assigisaat kifartuussinerillu.”*

§ 5, imm. 3, 2. pkt.-imi eqqaaneqartutut sulianik sulisartoqatigiit suliaqartuusuniipput sulisartut ullumikkut sulisartunik amigaatigineqarfigisatut paasineqarsinnaasut. Nunanit allamiunik Aqutsisoqarfiup (Udlændingestyrelsen) nunanit allamiunut inatsisaasoq malillugu qinnuteqaatit suliarisassatut tigusaasa amerlanerpaartaat suliffinnut taama ittorpianut tunngasutut nunanit allanit sulisartut sulinermit najugaqarnermullu akuersissutit pillugit qinnuteqarnerisigut tamanna ilaatigut takuneqarsinnaavoq. Nalinginnarmik tassaapput akunnittarfiit neriniartarfiillu aamma takornariartitsinermik inuussutissarsiorfiup iluini suliaqartitsinerit. § 5, imm. 3. uniffiit aappaanni atuuttutut oqaasertaliinermi suliniummik angisuumik aallartisaaneq suliffeqarfinni qarsunniagassanik nassataqartunik annertusisumik artukkiissaaq, takornariartitsinermik inuutissarsiorfiup ineriartortinneranut immikkut ittumik killup tungaanik nassataqarluni siuarsarnermik kigaallassaasutut sunniuttussamik.

Siunnersuummi § 1, nr. 2-mi aalajangersagaq aqcutigalugu § 6, imm. 1, nr. 1 allanngortinneqassaaq, tassani suliniut suliniutinut angisuunut inatsimmi malittarisassiat malillugit neqerooruteqarsinnaanermut aningaasat 5 milliarder kr.-nit 1 milliard kr.-nut allanngortinneqarlutik.

Citronen Fjordimi zinkimik suliniutit, aamma aatsitassanut qaqutigoortunut tunngasutut Kuannersuarni suliniutit itunik piukkunnaateqartutut neriuartulittut aatsitassarsiornermik suliniutit nunat tamalaani unammillernermit tunngasutut atugassaqarluni neqeroorutigineqarsinnaanissaat allannguutit nassatarissavaa. Taamaalilluni suliniutit taakku aningaasaliiffigisinaanissaannut piviusunngortinnissaannullu periarfissat annertusissapput. Taamatutaaq aningaasanik killissarisap appartinnera Kalaallit Nunaanni erngup nukinganik nukissior-

nissamik piukkunnaataasut ineriartortinnissaannut aningaasaliissutinik aggersaanissamut periarfissanik pitsanngorsaassaaq.

<b>Inatsisissatut siunnersuut inatsimmut atuuttumut assersuullugu</b>	
	<i>Inatsisissatut siunnersuut</i>
	<b>§ 1</b>
<p><b>§ 5. Imm. 3.</b> Sanaartornermik ingerlatat paasineqassaaq tassaasoq sanaartornerup nalaani suliniummi suliassanik sanaartukkanik pilersitsinermi illuliortiternernik sanaartornermillu suliaqarnerit aammalu ingerlatat tassunga atasut. Suliniutit taakkununnga attuumassuteqartunulli ilaanngillat nerisasioorneq, nerisarfinnik kantiinanik ingerlatsineq, eqqiaaneq, sumiiffimmi assartuineq tamatumunnga attuumassuteqartut suliallu assigisaat kiffartuussinerillu.</p>	<p><b>1.</b> ” § 5 imm. 3, 2. pkt. atorunnaarsinneqarpoq.”.</p>
<p><b>§ 6.</b> Suliniut Inatsisartut inatsisaat manna naapertorlugu suliniutitut angisuutut isigineqassaaq, ima pisoqarpat: 1) suliniummi sanaartornermut aningaasartuutit milliard-it tallimat danskit koruunii sinnersimappagit, aamma</p>	<p><b>2.</b> ” § 6. Suliniut Inatsisartut inatsisaat manna naapertorlugu suliniutitut angisuutut isigineqassaaq, ima pisoqarpat: 1) suliniummi sanaartornermut aningaasartuutit milliardit ataaseq danskit koruunii sinnersimappagu, aamma</p>
	<b>§ 2</b>
	<p>Inatsisartut inatsisaat 1. juli 2019-imi atuutillerpoq.</p>

### **3. Pisortanut aningaasaqarnikkut allaffissornikkullu kingunerisinnaasai**

Siunnersuut imaaliallaannartumik nunatta karsianut aningaasaqarnikkut kinguneqassanngilaq. Siunnersuummik akuersissuteqarneq aatsitassarsiorfinnik anginerusunik sanaartornermut aamma erngup nukinganik nukissiornissamik suliniutinut aningaasaliisitsiniarnermik oqilisaassaaq, aammalu Kalaallit Nunaanni suliniummik angisuumik ataatsimik imaluunniit amerlanernik piviusunngortitsinissamut aqutissiuussissaaq, taamaalillunilu inuiaqatigiit anin-

gaasaqarnerannut ilorraap tungaanut ilapittuuteqassalluni. Siunnersuut allaffissornikkut kingunerisassaqaassanngilaq.

**4. Inuussutissarsiorfimmuut aningaasaqarnikkut allaffissornikkullu kingunerisinnaasat**  
Siunnersuummik akuersissuteqarnerup nassatarissavaa aatsitassarsiorfinnik aamma erngup nukinganiq nukissiorfinnik sanaartornernut atatillugu sanaartornissamik suliassat amerlanerit nunat tamalaani ilisimasatut atugassarisat piomasaaqatillugu atorlugit, taamaalillunilu nunat tamalaani niuffaffimmi unammillersinnaasutut atugassarisat atorlugit neqeroorutigineqarsinnaalernissaat. Suliniutinut angisuunut inatsimmik atugaqarsinnaaffiup annertusineratigut, Kalaallit Nunaanni inuussutissarsiorfiusup ilaanut allanut ajoqutissanik nassataqartunik akigitat aningaasarsiallu qaffannerisigut suliffeqarfimmi qarsunniagassanik pinngortoqarnissaa ingalassimaneqarsinnaavoq.

Tamakku saniatigut siunnersuut inuussutissarsiorfimmuut allaffissornikkut aamma aningaasaqarnikkut kingunerisassaqaassanngilaq.

**5. Avatangiisinut, pinngortitamut innuttaasullu peqqissusaannut kingunerisinnaasat**  
Siunnersuut avatangiisinut, pinngortitamut innuttaasullu peqqissusaannut kingunerisassaqaassanngilaq.

**6. Innuttaasunut kingunerisinnaasat**

Siunnersuut innuttaasunut kingunerisassaqaassanngitosq nalilersorneqarpoq.

**7. Kingunerisinnasat pingaarutillit allat**

Siunnersuut allanik pingaarutilinnik kingunerisassaqaassanngilaq.

**8. Pisortanik kattuffinnillu tusarniaanerit**

Siunnersuut piffissami xx. xxx 2018-imit xx. xxx 2018-imut makkunani tusarniaassutaasimavoq:

Aamma siunnersuut Namminersorlutik Oqartussat tusarniaanermut nittartagaanni piffissami xx. xxx 2018-imit xx. xxx 2018-imut tamanut ammasumik tusarniaassutaasimavoq.

Tusarniaanermut akissutit makkunannga tiguneqarsimapput:

Tullinguuttumi tusarniaanermut akissutit tusarniaanerullu nalaani allannguutissatut siunnersuutit takkuttut sammeneqassapput. Akissutaasut uingasunik allanneqartut taamaallaat pingaarutaasa tulluassusiat najoqqutaralugu ilanngunneqartuunerat malugeqquneqassaaq. Tusarniaanermut akissutit tamakiisut tamarmik Inatsisartuni ataatsimiititalianut suliarinnittuusunut nassiunneqarput.



## **Inatsisissatut siunnersuummi aalajangersakkanut ataasiakkaanut oqaaseqaatit**

### *§ 1-imut*

Nr. 1-imut

§ 3, imm. 1-imi aalajangersagaq malillugu Inatsisartut inatsisaat atugarineqarfissaanik aalajangiinermut aalajangersagaq pingaaruteqarpoq. Siunnersuut malillugu tassunga atasutut sulianut, soorlu nerisassiornermut, nerisarfinnik kantiinanik ingerlatsinernut, eqqiaanernut, sumiiffimmi assartuineranut tamatumunnga attuumassuteqartunut suliallu assigisaannut kiffartuusinernullu Inatsisartut inatsisaat atorneqarsinnaassaaq.

Taamaattorli suliniummik ingerlatseqatigiiffiit taakkulu kiffartuussisuisa Kalaallit Nunaanni suliffeqarfinnik aamma Kalaallit Nunaanni sulisartunik atuineri pillugit Naalakkersuisut § 7, imm. 5 malillugu aalajangersakkanik aalajangersaasussaanerannik § 3, imm. 1-imik allannguteqarnerup allanngortinngilaa. Taamaalilluni neqeroorutinik pissarsiornermut aamma namminersorlutik oqartussat, pisortani oqartussaaffeqarfiit allat aamma suliniummik ingerlatseqatigiiffiup akornanni pingasuulluni isumaqatigiissutit atsiorerannut atatillugu Kalaallit Nunaanni suliffeqarfiit aamma Kalaallit Nunaanni sulisartut atugarinissaat sapinngisamik annertunerpaamik siuarsarneqassapput, takuuk § 9, imm. 3-6.

Nr. 2-mut

Suliniutip sanaartornermut aningaasartuutai danskit koruunii 1 milliardit sinnersimassavai. Tamatuma sanaitigut pissutsinit marlunnit tullinnguuttunit ataatsip tassaniittuunissaa aalajangiisimaneqarpoq. Sanaartornermik suliaqarnerit isumaginerini suliniutip sulisartunik pisariaqartitsinera Kalaallit Nunaanni pissarsiarineqarsinnaasutut sulisartut naleqquttut, suliffissaaleqisut aamma pissarsiarineqarsinnaasut qaangersimassavaa, imaluunniit suliffeqarfinni sanaartornermik suliassanik isumaginnittartuni suliniutip teknikkip tungaatigut aningaasaqarnikkullu piginnaasaqarnissamik piumasarisai Kalaallit Nunaanni suliffeqarfiit teknikkip tungaatigut imaluunniit aningaasaqarnikkut piginnaasaanut tunngasut qaangersimassavai.

Sanaartornerup nalaani sulisartunik pisariaqartitsinerup aamma sulisartut najukkami pissarsiarineqarsinnaasut akornanni annertuumik avissaaqqasoqarnera uppersarneqassaaq. Avis-saaqqaneq avataanit aggersunit sulisartunik atugaqartinnani matuneqarsinnaassanngitsoq. Kalaallit Nunaanni suliffeqarfimmi piginnaasalinnik sulisartoqarnera pillugu nalilersuineq ilaatigut siunnersuummi § 9-mi aalajangersagaq malillugu inuiaqatigiinni piujuartitsineq pillugu nalilersuinerup suliarineratigut uppersaaitit pissarsiarineqartussat tunngavigalugit pissaaq.

Kalaallit Nunaanni teknikkip tungaatigut aamma aningaasaqarnermi piginnaasaqarnerit nalilersornerat siunnersuummi § 9-mi aalajangersagaq malillugu inuiaqatigiinni piujuartitsineq

pillugu nalilersuinerup suliarineratigut uppersaatit pissarsiarineqartussat tunngavigalugit pissaaq. Kalaallit Nunaanni erngup nukinganik nukissiornissamik suliniutinik sanaartornermik suliaassanik, sanaartornermi 500 mio. kr. sinnerlugit aningaasartuutitaqanngitsunit misilitakkat piffissami matumani suliaassanik katitikkanik taama ittunik Kalaallit Nunaanni suliffeqarfiutillit akornanni naammattumik teknikkip tungaatigut imaluunniit aningaasaqarnikkut piginnaasaqartoqanngitsoq takutissimavaat.

*§ 2-mut*

Inatsisartut inatsisaata 1. juli 2019-imi atuutilernissaa siunnersuutigineqarpoq.